



# Ke tše kgolo go nna



Sipho R. Kekezwa



Letšatši le le latelago, ke letšatši la mathomo la Mpuna sekolong.

“Mma, o ntheketše diaparo tša sekolo?” A botšiša ka tetelo.



Ge o feditše dijo, o ka ya wa lebelela diaparo tša gago tša sekolo,” a realo mma, a šupa mokgobo wa diaparo tafoleng ya kgauswi.

Mpuna a phaka dijo a sa lemoge le kherote ye a sa e ratego ka dijong tša gagwe.



Mpuna a emelela ka pejana ge a fetša go ja gomme a thoma go nyakanyaka ka gare ga diaparo.

“Tša ka ke dife?” a botšiša, a topa diaparo ka bongwe ka bongwe.



Diaparo ka moka di lebega e le tše kgolo go yena e bile e se tše diswa.

“Itekantšhe tšona,” mma a bolela ka phišegelo.



Ge a e tšwa ka phapošing ye a bego a itekantšha diaparo tša gagwe tše diswa, buti ‘agwe Tiego a hwa ka disego.

Tatagwe a myemyela ka morago ga kuranta ye a bego a e bala.



“Ke tše kgolo go nna!” a bolela ka lentšu la makgwakgwana.

“O se tshwenyege ngwanaka. Ke tla go lokišetša tšona. Gosasa, o tla lebega gabotse,” a realo mma. Mpuna ga se a kwešiša mmagwe, ka gore o be a sa kgone go sepela gabotse ge a di apere.



Mpuna a tšea sephetho sa go se ye sekolong.

A robala ka pelo ye bohloko le pono ya letšatši la gagwe la mathomo ya go fapano le ya pele.



O be a sa nagana ka se ge a swarwa ke boroko.



“Mathaka, yo yena o apere dieta tša tatagwe,” gwa realo yo mongwe wa bašemane ba ba golwane ka sekolong, a šupa Mpuna.

“Hempe ya gagwe o ka re roko,” gwa bolela yo mongwe.



“Morena Marokgo,” gwa tlaleletša wa boraro.

Mpuna o ile a itshwara ge bana ba bangwe ka sekolong ba mmogetše.



Mpuna o ile a tšhaba gomme a leka go utamela sehlopha sa bašemane ba ba bego ba mo kwera.

Ge a leka go tšhaba, a ikgata seeta se sengwe a wela fase gomme sona sa fofela godimo pele le sona se wela fase.



“Ntlogeleng! Ntlogeleng!” a goelela. O kgonne fela go bolela seo a lla.



“Mpuna! Mpuna, tsoga! Mpuna a kwa lentšu la mmagwe.

A bula mahlo a go seka dikeledi.



“Tsoga! Bosele!” E be e le mmagwe ka nnete.



Mpuna a tsoga bolalong, a lebelela kua le kua.

O be a se ka sekolong. O imologile ka ge a se ka sekolong.



O be a se a apara ... A thoma go gopola borokgo bja Tiego!

A gopola hempe e telele! Dieta tšona...!



“Ke...ke opa ke hloogo,” a realo a ikhupetša gape.

“Mpuna ngwanaka, tsoga,” mmagwe a realo a tseba gabotse gore o tshwenywa ke eng.



“Lebelela diaparo tša gago tša sekolo.”

Ka ntle le go tsoga, a di hlola ka fase ga dikobo.  
Godimo ga setulo sa kgauswi le mpete wa gagwe,  
go be go na le diaparo tša sekolo tša go mo lekana.



Mpuna o be a thabetše diaparo tša gagwe tša sekolo ebole a sa nyake gore mmagwe a mo thuše go apara bjale ka mehleng. Mpuna a lebelela fase gomme a lla.

Ge a buša mahlo, mmagwe o be a swere lepokisi. O be a myemyela go fetiša dikeledi tše a bego a leka go di swara. “Mma, o nthecketše dieta?”



“Ee Mpunana,” gwa araba mmago Mpuna. Mpuna a gokarela mmagwe.

“Ke a leboga, Mma.”



Dilo ka moka di be di sepela gabotse letšatšing la Mpuna la mathomo sekolong. O be a thabile.

